

զհրաշափառ տօն սուրբ Ջատկի Յարութեան և ելեալ ի դուրս, որ էր օր ամսոյ Ապրիլի ԺԴ թվին ՌԴԹ Հայոց:

Ապրիլի ԺԸ Եչի ելաք յերուսաղէմէ, և մահտեսի հայր մեր բաժանեալ ի մէնջ զհայր ի Սուրբ Կարապետ, և մեր իջեալ ընդ մահտեսի մարբ մերով ուխտաւորօք¹⁾ յՌամլայ և Գ փոքր նաւ վարձեալ, որ ասի սումպէքի, ԻՅ Ապրիլի Բչի ելաք անտի ի ծով: Գչի (23 Ապրիլ) երեկոյին ի Սայտայ ելաք և առաջի պահու գիշերոյն ելաք անտի, Եչի (25 Ապրիլ) երեկոյին հասաք ի Պերութ: Եւ անտի ելեալ յետ պահու ինչ մօտ լուսոյ Եչի աւուրն՝ Շաբաթ (27 Ապրիլ) երեկոյին հասաք ի Տրապօլիս: ԻԸ ամսոյ Կիրակի աւուր չըջեալ գտեղին և զքաղաք, որ ի բաց կայ ծովէ և երեկոյն ելեալ անտի նաւեցաք ի Կիպրոս Բչի աւուրս (29 Ապրիլ): Եւ ոչ գոլոյ աջողակ հողմոյ, փոքր փոքր առեղերով կղզոյն երթայաք զչաբաթն ի բուն: Եւ յառաւօտի Շաբաթու՝ Մայիսի Գ մեկնեցաք անտի, նաւէաք ի ծովն եւ ի նսեմանալ երեկոյն եղեւ մրրիկ հողմոյ մեծ և տատանէաք մեծ կոծով և երկիւղիւ ի մէջ փոքր նաւին, որ ահագնատեսիլ ունէր անհուն ծովն, միայն զինքն ցուցանելով իբրեւ զլերինս ի վերայ մեր, մերթ ի վերայ իւր առնելով բարձրանայաք և մերթ յանդունդս կարծէաք զմեզ գոլ. և միւս ընկերք այլ ոչ երեւին, զի կորուսաք զմիմեանս: Սակայն գթածն և ողորմածն ոչ արար ըստ մեղաց մերոց, այլ փրկեաց ի մեծ վտանգէն և մերձ առ լոյսն խաղաղանայր սակաւ, և կէս աւուր Կիրակէիս (5 Մայիս) հազիւ արկաք յանձանօթ տեղի մի անբնակ և հանգեալ անդ ի ցաւոց և ի վշտաց մինչ երեկոյ, և ելեալ անտի առաւօտուն (6 Մայիս)՝ հասաք յԱտալիա²⁾:

1) ըխտաւորօք.

2) յԱլայիայ.